

- राष्ट्रपति चुनाव खातर एनडीए उम्मीदवार रामनाथ कोविंद आज संसद भवन मं नामांकन पर्चो कर्या दाखिल- इण मौके प्रधानमंत्री नरेन्द्र मोदी पार्टी रा ठावा नेता अर भाजपा शासित राज्यां रा मुख्यमंत्री रह्या मौजूद।
- भारतीय अंतरिक्ष अनुसंधान संगठन-इसरो आज सुवारै कार्टोसैट-2 ई अर तीस दूजा नैनो उपग्रहां नै सफलतापूर्वक कर्यो थापित।
- भरतपुर जिला रै मांय जाट आरक्षण आंदोलन नै ध्यान मं राखता थकां कानून व्यवस्था बणाया राखता खातर धारा 144 रै तैत निषेधाज्ञा करीगी लागू।
- प्रदेश रा दक्षिणी हलका समेत दूजी केई जगहां मानसून पूर्व री व्ही बिरखा।

000

राष्ट्रपति रा चुणाव खातर एनडीए उम्मीदवार रामनाथ कोविंद आज संसद भवन मं आपरा नामांकन रो पर्चो दाखिल कर्या। इण मौके प्रधानमंत्री नरेन्द्र मोदी, भारतीय जनता पार्टी रा अध्यक्ष अमित शाह, पार्टी रा ठावा नेता लाल कृष्ण आडवानी, मुरली मनोहर जोशी अर भाजपा शासित राज्यां रा मुख्यमंत्री अर केई ठावा पार्टी नेता अर केन्द्रीय मंत्री मौजूदा हा। नामांकन रै पछै खबरनवीसां सूं बातचीत करता थकां श्री कोविंद कह्या कै राष्ट्रपति रो पद संविधान रो सबुउंचो पद है। वै कह्या कै राष्ट्रपति रो पद राजनीतिक नीं है अर इण नै राजनीति सूं दूर राखणो चहिजे।

राष्ट्रपति पद खातर नामांकन दाखिल करबा री आखिरी तारीख 28 जून है। 17 जुलाई नै चुणाव व्हेला अर 20 जुलाई नै वोटा री गिणती कराई जावैला।

000

भारतीय अंतरिक्ष अनुसंधान संगठन - इसरो आज सुवारै कार्टोसैट-2 ई अर तीस दूजा नैनो उपग्रहां नै कक्षा मं सफलतापूर्वक थापित कर दीनो। पी एस एल वी- सी 38 रॉकेट श्रीहरिकोटा सू उड़ान भरबा रै करीब 16 मिनट पछै कार्टोसैट-2 ई नै कक्षा मं थापित कर्यो। यां तीस नैनो उपग्रहां मं 29 उपग्रह फ्रांस, जर्मनी, इटली, जापान अर अमरीका समेत 14 देशां रा हैं, जदकि एक उपग्रह निजी शिक्षा संस्थान रो है। कार्टोसैट श्रृंखला रा उपग्रह शहरी अर ग्रामीण नियोजन, तटीय भूमि रा उपयोग, सड़क नेटवर्क निगरानी, जल वितरण अर भौगोलिक सूचना प्रणाली खातर महवजोगा आंकड़ा जुटावैला। प्रधानमंत्री नरेन्द्र मोदी इसरो नै उपग्रहां रा सफल प्रक्षेपण खातर बधाई दीना है।

000

देश रै मांय 60 बरस सूं बत्ती उमर रा वरिष्ठ नागरिकां अर आठ बरस सूं कम उमर रा टाबरां नै पासपोर्ट शुल्क मं 10 फीसदी री छूट मिलैला। विदेश मंत्री सुषमा स्वराज पासपोर्ट कानून रै अमल मं आबा रा पचास बरस पूरा होबा रै मौके आज नुवी दिल्ली मं राखिज्या जळसा रै मांय या घोषणा कर्या। वै कह्या कै सरकार या तैय करैला कै पासपोर्ट रै खातिर आवेदन करबा वास्तै किणी मिनख नै 50 किलोमीटर सूं बत्ती दूर नी जावणो पडै। इण नै ध्यान मं राखता थकां अबार ताणी 251 डाकघर पासपोर्ट सेवा केन्द्र खोल्या जा चुक्या है। वै बताया कै पासपोर्ट अब अंग्रेजी रै साथै हिन्दी मं भी छाप्या जावैला।

000

एक जुलाई सू देशभर मं लागू व्हेबाळा जीएसटी नै लेर फिक्की कानि सू बैठक राखिजी जिण रै मांय प्रदेश रा ब्योपारी शामिल व्हीया। इण मौके जीएसटी विशेषज्ञ गौरव गुलाटी बताया कै बैठक मं जीएसटी सू व्हेबाळा फायदा बाबत ब्योपारियां नै बतायो गयो।

000

प्रधानमंत्री नरेन्द्र मोदी 25 जून नै आकाशवाणी सू मन की बात कार्यक्रम मांय आपरा विचार साझा करैला। मन की बात कार्यक्रम री या 33 वीं कड़ी व्हेला। आकाशवाणी अर दूरदर्शन रा पूरा नेटवर्क माथै या कार्यक्रम सुवारै 11 बज्या प्रसारित कर्यो जावैला। इण कार्यक्रम नै निजी टेलीविजन अर समाचार चैनलां सू भी प्रसारित कर्यो जावै है। मोबाईल एप अर ऑलइंडिया रेडियो लाईव स्ट्रीमिंग रै जरिये इण नै विश्व रा दूजा क्षेत्रां मं भी सुण्यो जा सकै है।

000

भरतपुर जिला रै मांय जाट आरक्षण आंदोलन नै ध्यान मं राखता थकां कानून व्यवस्था बणाया राखबा खातर तुरंत प्रभाव सू धारा-144 रै तैत निषेधाज्ञा लागू करीगी है। अ आदेश 30 जून ताणी जारी रवैला। इण बीचै आन्दोलन रै कारण सड़क अर रेल यातायात माथै असर पड़्यो है। प्रशासन अर पुलिस अधिकारियां कानि सू समझाइश रै जरिये यातायात सुचारू करबा री जुगत करी जा री है। जाट समाज रा लोगां कानि सू बहज गांव रै कनै रेल पटरियां माळै रूकावट गेरबा रै कारण गाड़िया री आवा-जाहि रदद कर दीगी है। उत्तर परिश्चम रेलवे रा वरिष्ठ जनसम्पर्क अधिकारी बताया कै मथुरा अर जयपुर रै बीचै चालबाळी पैसेंजर गाडी आज दोन्यू ओड़ सू रदद कर दी गी। जद कि जयपुर-आगरा फोर्ट रेलगाड़ी बांदीकुई ताणी चलाई गी। इण रै अलावा जयपुर इलाहाबाद रेलगाड़ी नै आज जयपुर-मथुरा रै बीचै आंशिक रदद कर्यो गयो है। इणी भांत बांदीकुई-बरेली गाडी बांदीकुई-आगरा फोर्ट रै बीचै रदद करी गी। रेलवे वाराणसी सू काल जोधपुर खातर रवाना व्ही रेलगाड़ी नै बयाना-गंगापुरसिटी सवाईमाधोपुर रै गैलै जैपुर ल्यायो जा रियो है। इण बीचै रेलवे पटरियां री सुरक्षा बढ़ा दी गी है।

सामाजिक न्याय अर अधिकारिता मंत्री अरुण चतुर्वेदी कह्या कै ओ बी सी आयोग कानि सू काल मुख्यमंत्री नै पेश करीगी रपट नै केबीनेट रै सागै धरयो जावैला।

0000

भारतीय जनता पार्टी रा राष्ट्रीय सह संगठन महामंत्री शिव प्रकाश आज जयपुर रै मांय राजस्थान रा पार्टी पदाधिकारियां री बैठक लीना। इण मौके प्रदेश भाजपा अध्यक्ष अशोक परनामी समेत सगळा मोर्चा रा पदाधिकारी मौजूद हा। बैठक रै मांय अशोक परनामी कह्या कै प्रदेश मं भाजपा नै मजबूत करबा वास्तै मण्डल अध्यक्ष अर पदाधिकारियां री या बैठक राखीजी।

000

केन्द्र सरकार रा कार्यकाल रा तीन बरस पूरा व्हेबा रै मौके आज बाड़मेर जिला रा धारासर गांव मं सबका साथ सबका विकास कार्यक्रम राखिज्यो। इण मौके प्रधानमंत्री उज्वला योजना रै तैत गरीब महिलावां नै मुफ्त गैस कनेक्शन दिया गया। चोहटन विधायक तरुण राय कागा अर प्रधान कुम्भा राम री मौजूदगी मं व्हीया इण कार्यक्रम मं ग्रामीणां नै केन्द्र सरकार री न्यारी न्यारी योजनावां री जाणकारी दीगी।

000

राज्य सरकार आदेश जारी करर प्रदेश रा न्यारा न्यारा प्राधिकरणां, नगर सुधार न्यासां राजस्थान आवासन मण्डल अर स्थानीय निकायां मं बकाया लीज रकम आबाळी 30 सितम्बर ताणी एक मुश्त जमा कराया जाबा माथै ब्याज री रकम मं पूरी छूट दे दीनी है।

000

केंद्रीय माध्यमिक शिक्षा बोर्ड एम बी बी एस अर बी डी एस पाठ्यक्रमां मं दाखिला खातर राष्ट्रीय प्रवेश पात्रता परीक्षा नीट रा नतीजा घोषित कर दीना है। नतीजो वेबसाइट [www.cbse.nic.in](http://www.cbse.nic.in) णबईमदमजण्दपबण्पद माथै देख्या जा सकै है। नीट 2017 रा नतीजा उच्चतम न्यायालय रा हुकम रै पछै घोषित कर्या है। हजारू पढ़नियां नै राहत देवता थकां न्यायालय लारलै मीनै केंद्रीय माध्यमिक शिक्षा बोर्ड नै नीट रा नतीजा घोषित करबा री मंजूरी दीनी ही।

000

रणथम्भौर राष्ट्रीय अभयारण्य मं आज मादा बाघिन टी-19 नै चार शावकां रै सागै देख्या जाबा रै पछै उद्यान मं खुशी रो माहौल है। म्हाका खबरनवीस बताया कै इण बाघिन नै आज सुवारै अभयारण्य रा लकडदा अर बेरदा खेतार रै बीचै देख्यो गयो हो।

000

प्रदेश रा दक्षिणी हिस्सों मं आज कई हलकां मं चोक्षी बिरखा व्ही है। उदयपुर रै मांय मूसलाधार बिरखा सू सड़का माळै पाणी भरग्यो। पाली जिला रै मांय रायपुर सौजत रोड़, मारवाड़, घाणेराव, सादड़ी अर देसुरी मं करीब आधा घण्टा ताणी तेज बिरखा व्ही जिण सू सड़का माळै पाणी बहबा लाग ग्यो।

000

रमजान मीना रा आखिरी शुक्रवार नै आज जैपुर समेत प्रदेशभर मं जमातुलविदा री नमाज अदा करीगी। इण खातर प्रदेश मं सुरक्षा रा सावल बन्दोबस्त कर्या गया। वैठि नै झालावाड़ मं काल शब-ए-कद्र श्रद्धा रै साथै मनायो गयो अर लोग रातभर इबादत कर्या।

000

अर अबै जिलां सू मिली दूजी खबरां

- हनुमानगढ़ जिला मं प्रधानमंत्री ग्राम सड़क योजना रा दूसरा चरण रै तैत 102 किलोमीटर लाम्बी नौ सड़कां बणाई जावैला ।
- अजमेर रा आनासागर मं आज एक बालिका री डूब जाबा सूं मौत व्हैगी । या हैदराबाद रा मिलियाना गांव सू आपरी मां नाजिया रै सागै जियारत खातर अजमेर आई ही ।
- झालावाड़ जिला मांय 11 केन्द्रां माथे राजफैड अर भारतीय खाद्य निगम रै जरिये 21 लाख 91 हजार किवं. गेहूं री समर्थन मूल्य माळै खरीद करी गी है ।
- पाली जिला रा नाडोल मं पुलिस एक कार सू 232 किलो डोडापोस्त बरामद कर्या है । इण दौराण तस्करी सू डोडापोस्त ल्याबाळा सगळा लोग फरार व्हैग्या ।
- बूंदी जिला रा नैनवा मं पुलिस एक जणा रै कनै सूं स्मैक बरामद करर उण रै खिलाफ एनडी पी एस एक्ट रै तैत कार्यवाही सरू कर दीनी है ।
- भीलवाड़ा जिला रा गुलाबपुरा रै कनै खातीहेड़ा गांव मं कुआं मं डूबबा सूं दो सगी बहणा री मौत व्हैगी ।
- चूरू जिला रै मांय साखू फोर्ट गांव मं औषधी महकमो निजी सफाखाना मालै छापो गेरर एक लाख रूपया री दवाईयां जब्त करी है ।